

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 सोमवार

09.09.2024

प्रमुख समाचार –

- 1— भगवान बलराम के जयंती ल आज प्रदेशभर म किसान दिवस के रूप म मनाय गीस – रईपुर म होवइया किसान दिवस कारीकरम म मुख्यमंत्री विष्णुदेव साय होइन सामिल।
- 2— केंद्र सरकार ह राज्य अउ केंद्रशासित प्रदेश मन ल मंकीपॉक्स के सबो संदिग्ध मामला के जांच अउ परीक्षण करे बर किहीन।
- 3— बस्तर संभाग म दू दिन ले होवत बरसा ले आम लोगन मनके जीवन अस्त-व्यस्त होगे हे।

किसान दिवस

भगवान बलराम के जयंती ल आज प्रदेशभर म किसान दिवस के रूप म मनाय गीस। रईपुर के इंदिरा गांधी कृषि विश्वविद्यालय म होवइया किसान दिवस कारीकरम म मुख्यमंत्री विष्णुदेव साय सामिल होइस। ओमन ह भगवान बलराम अउ हल के पूजा-पाठ करके कारीकरम के सुरुआत करीन। ए दौरान राज्य स्तरीय समारोह म मुख्यमंत्री ह “जैविक खेती” उपर आधारित नवाचार ल देखिस अउ स्टाल मन के अवलोकन घलो करीन।

समारोह ल संबोधित करत मुख्यमंत्री ह किहीन कि गौ-आधारित प्राकृतिक खेती किसान मन बर खुसहाली अउ समृद्धि के रास्ता खोलही। जैविक खेती ले जुड़ के धान के कटोरा के किसान समृद्ध होही। ओमन ह ए मउका म भगवान बलराम के जयंती ल हर बछर किसान दिवस के रूप म मनाय के आह्वान करीन। कारीकरम म मुख्यमंत्री ह गौ-आधारित जैविक अउ प्राकृतिक खेती करइया अउ ए क्षेत्र म प्रेरित करइया उत्कृष्ट किसान मन ल सम्मानित करीन।

समारोह ल अखिल भारतीय किसान संघ के दिनेश कुलकर्णी, कृषि मंत्री रामविचार नेताम अउ सांसद बृजमोहन अग्रवाल ह घलो संबोधित करीन।

किसान दिवस म “प्राकृतिक एवं गौ-आधारित कृषि” विषय म एक दिवसीय राज्य स्तरीय कार्यसाला घलो आयोजित करे गीस। ए कार्यसाला म छत्तीसगढ़ के आने-आने जिला मन ले आय दू हजार ले जादा किसान सामिल होइन। अइसने प्रदेश के आने-आने जिला मन म संचालित सत्ताईस कृषि विज्ञान केंद्र मन म घलो आज बलराम जयंती म किसान दिवस के आयोजन करे गीस।

मंकीपॉक्स-निर्देश

केंद्र सरकार ह राज्य अउ केंद्रशासित प्रदेश मन ल मंकीपॉक्स के सबो संदिग्ध मामला के जांच अउ परीक्षण करे बर केहे हे। केंद्रीय स्वास्थ्य सचिव अपूर्व चंद्र ह मंकीपॉक्स ले संबंधित विश्व स्वास्थ्य संगठन के अंतर्राष्ट्रीय जन स्वास्थ्य आपात के घोसना करीन। मंत्रालय ह अपन परामर्स म मंकीपॉक्स ल लेके जागरूकता बढ़ाय अउ लोगन मन म फैले डर ल रोके बर निवारक उपाय अपनाय बर बल देहे। मंत्रालय ह वरिष्ठ अधिकारी मन डहार ले राज्य अउ जिला स्तर म स्वास्थ्य सुविधा बिसेसकर जन स्वास्थ्य ले संबंधित तियारी के समीक्षा करे के परामर्स घलो दीन।

उल्लास मेला

काली अंतर्राष्ट्रीय साक्षरता दिवस के मउका म मुख्यमंत्री विष्णुदेव साय ह रईपुर के पंडित दीनदयाल उपाध्याय ऑडिटोरियम म आयोजित राज्य स्तरीय उल्लास मेला म एक लाख उल्लास साक्षरता केंद्र के वर्चुअल शुभारंभ करीन। ए साक्षरता केंद्र मन ल संचालित करे बर शिक्षा विभाग के राज्य साक्षरता मिसन डहार ले एक लाख स्वयंसेवी शिक्षक चयनित करे गेहे। स्वयंसेवी शिक्षक अपन-अपन साक्षरता केंद्र म दस असाक्षर मन ल अक्षर ज्ञान ले परिचित कराके साक्षर बनाही। ए मउका म मुख्यमंत्री ह उल्लास पोस्टर, उल्लास गीत, न्यूज लेटर अउ ब्रोशर के विमोचन करीन। ए दौरान उल्लास कारीकरम उपर आधारित वित्त चित्र के प्रदर्शन घलो करे गीस।

समारोह ल संबोधित करत मुख्यमंत्री ह किहीन कि शिक्षा विकास के मूल मंत्र हे। मनखे ल कोनो भी क्षेत्र म विकास करना हे, त शिक्षा बहुत जरूरी हे। ओमन ह किहीन कि राज्य सरकार ह दस लाख लोगन मन ल साक्षर बनाय के लक्ष्य राखे हे। श्री साय ह किहीन कि छत्तीसगढ़ म नवा शिक्षा नीति ल लागू कर दे गेहे। छत्तीसगढ़ के दू सौ ग्यारा स्कूल पीएम श्री योजना के तहत संचालित होवत हे। ओमन ह ए मउका म लोगन मन ल उल्लास साक्षरता के सपथ दिलाइन।

मन की बात

प्रधानमंत्री नरेंद्र मोदी ए महिना के उनतीस तारीख के आकाशवाणी ले प्रसारित होवइया 'मन की बात' कारीकरम म देस अउ दुनियाभर के लोगन मन के संग अपन बिचार साझा करही। ए मासिक रेडियो कारीकरम के एक सौ चौदहवीं कड़ी होही। सुनइया मन, ए महिना के सत्ताईस तारीख तक टोल फ्री नंबर— एक आठ सून्य-सून्य एक-एक-सात आठ सून्य-सून्य (1800-11-7800) म कारीकरम बर सुझाव भेज सकत हे। एखर अलावा एक नौ दू-दू म मिस्ट्र कॉल दे के एसएमएस म मिले लिंक ले घलो सुझाव भेज सकत हे। नरेंद्र मोदी ऐप या माई जीओवी ओपन फोरम के जरिया ले ऑनलाइन सुझाव दे जा सकत हे।

बारिश

बस्तर संभाग म दू दिन ले होवत बरसा ले आम लोगन मनके जीवन अस्त-व्यस्त होगे हे।

नारायणपुर जिला म पाछू रतिहा ले होवत बरसा के बाद सबो छोटे-बड़े नदी नाला उफान म हे। कोंडागांव ले नारायणपुर के बीच छेरीबेड़ा नदी के पुल के उपर ले पानी बहे के सेति ए रद्दा म चलइया बस मन के पहिया रूक गे हे। एखर ले आना जाना बाधित हो गेहे। निचला बस्ती मन म घलो पानी भर गेहे। सुरक्षा के दृष्टि ले जघा-जघा होमगार्ड के जवान मन ल तैनात करे गेहे।

उहें, बीजापुर जिला म काली ले होवत बरसा के सेति राष्ट्रीय राजमार्ग क्रमांक-तिरसठ के उपर ले पानी बहत हे। एखर सेति बीजापुर अउ जगदलपुर रद्दा ले अवइया-जवइया सैकड़ो राहगीर अपन गाड़ी मन संग फंसे हे। एखरे संग दर्जन गांव के संपर्क जिला मुख्यालय ले टूट गेहे।

अइसने कांकेर जिला म पाछू रतिहा ले होवत बरसा के सेति कांकेर सहर ले जवइया दूध नदी के अलावा जिला के आने-आने इलाका मनले गुजरइया कोटरी, मेढकी अउ खंडी नदी के जल स्तर बाढ़ गेहे। उहें, भानूप्रतापपुर-संबलपुर रद्दा म पानी पूल ले लगभग तीन फीट उपर बहे के सेति आना-जाना बंद होगे हे। एखरे संग कोटरी नदी घलो उफान म हे। एखर ले

कोयलीबेड़ा मुख्यालय के अट्ठारा ग्राम पंचायत ले संपर्क टूट गेहे। कोयलीबेड़ा ले अंतागढ़ के बीच फांसीनाला म तीन फीट उपर पानी भरे ले रदा म आना-जाना बाधित होय हे।

जांच रिपोर्ट-वाट्सऐप

बिलासपुर के सिम्स अउ जिला अस्पताल म पैथोलॉजी जांच के रिपोर्ट अब मरीज अउ ओखर परिजन मन ल व्हाट्सऐप मैसेज म भेजे जाही। बिलासपुर कलेक्टर अवनीश शरण ह सिम्स अउ जिला अस्पताल के निरीक्षण करे के बाद दूनो संस्था मनके प्रबंधन ल एखर बर निरदेस दे हे। पहिली ए व्यवस्था जिला अस्पताल म ओखर बाद सिम्स अस्पताल म सुरु होही।

सिम्स अस्पताल म निरीक्षण के बाद कलेक्टर जिला अस्पताल पहुंचिस। ओमन ह हमर लैब अउ यूनिट ल जल्दी सुरु करे के संग ही पैथोलॉजी रिपोर्ट व्हाट्सऐप म दे के निरदेस दीन।

तबादला

राज्य शासन के नगरी प्रशासन विभाग ह एक सौ सैंतालिस अभियंता मनके नवा पद स्थापना के तीन आने-आने आदेस जारी करीन। स्थानांतरित अधिकारी मन म अधिक्षण अभियंता ले लेके कार्य पालन अभियंता, सहायक अभियंता अउ उप अभियंता सामिल हे। नगरी प्रशासन विभाग डहार ले सबो स्थानन्तरित अभियंता मन ल सात दिन के अंदर कार्यभार ग्रहण कर के विभाग ल सूचित करे बर कहे हे।

दुर्घटना

जांजगीर-चांपा जिला म तीन अलग-अलग घटना मन म दू माईलोगन मन संग तीन लोगन मनके मउत होगिस। पहिली घटना बलौदा थाना क्षेत्र के सुल्ताननार गांव के हरय, जिहां नाला म डूबे ले एक झिन माईलोगन के मउत होंगे। उहें, दूसर घटना मूलमूला थाना क्षेत्र के तागा गांव के हरय, जिहां एक माईलोगन तालाब म फिसलके गिर गीस, जेखर ले ओखर मउत होंगे। तीसरइया घटना अकलतरा थाना क्षेत्र के कोटमीसोनार रेलवे स्टेसन तीर के हे, जिहां एक मनखे के ट्रेन के चपेट म आय ले मउत होंगे।

ओति, कोंडागांव जिला के बोरगांव तीर राष्ट्रीय राजमार्ग क्रमांक तीस म कार अउ ट्रक के बीच टक्कर होगिस। ए दुर्घटना म कार चलइया के मउत होगिस। उहें, कार म सवार आने चार लोगन घायल होंगे हे। दुर्घटना के दौरान पाछू ले आवत स्कूटी सवार घलो ए हादसा म घायल होगिस। सबो घायल मन ल फरसगांव अस्पताल म भर्ती कराय गेहे।

सरपंच हत्या-कारावास

सक्ति जिला के द्वितीय अपर सत्र न्यायालय ह भुतहा गांव के सरपंच के हत्या के मामला म छै आरोपी मन ल आजीवन कारावास के सजा सुनाय हे। ए घटना दिसंबर दू हजार इक्कीस के हरय। जब आरोपी मन ह बावन एकड़ शासकीय भूमि म अवैध कब्जा कर ले रिहीन, जेखर सिकायत सरपंच डहार ले करे म शासन ह आरोपी मन उपर कार्रवाई करे रिहीन। एखर ले नाराज आरोपी मन ह सरपंच के हत्या कर दे रिहीन।

